

Izjava: Visoki predstavnik govorio na prvoj sjednici Komisije za reformu odbrane u 2005. godini

Govoreći danas na prvoj sjednici Komisije za reformu odbrane u njenom novom mandatu, visoki predstavnik, Paddy Ashdown, pozdravio je nastavak reforme sektora odbrane u BiH, zapažajuci da su dosadašnja dostignuća BiH već učinila kredibilnim kandidatom za program NATO-a Partnerstvo za mir te da je uspjeh ovog pristupa "poslužio kao model za sveukupni program reformi u BiH".

Reforma odbrane je proces koji traje – modernizovaće odbrambene institucije BiH, uskladiti ih sa standardima koje je postavio NATO za program Partnerstvo za mir te stvoriti profesionalne oružane snage, rekao je visoki predstavnik. Reforma je također kreirana da razriješi sistemske slabosti u provođenju zakona i sigurnosnim institucijama BiH, koje su proteklih devet godina opstruirale saradnju BiH sa Haškim tribunalom.

Komisija za reformu odbrane je 2003. godine predložila da se pažnja obrati i na vrijeme nakon Partnerstva za mir, prema jasnoj obavezanosti ka budućem članstvu u NATO-u. Mandat koji je Komisija za reformu odbrane dobila od visokog predstavnika 31. decembra 2004. godine, pomoće ubrzanje ovog procesa. To znači da će do kraja ove godine oba entitetska ministarstva odbrane prestati da postoje, a njihove funkcije biće prenesene na državu.

Visoki predstavnik je upozorio na stalno rastuće budžetske deficite od strane entiteta. Ova zaduženja mogla bi dostići paralizirajuće razmjere tokom naredne godine. Sagledavajući

nivo trošenja na odbranu koje su odobrili parlamenti u BiH ove godine jasno je da BiH ne može da si priušti tri ministarstva odbrane, ili tri generalštaba. U ovom kontekstu, posao Komisije za reformu odbrane važniji je nego ikad.